

No. 42 [No. 26(64), No. 43, No. 125(32.4)]

佛说铁城泥犁经

东晋西域沙门竺昙无兰译

佛在舍卫祇洹阿难邠坻阿蓝时，佛诫诸沙门言：「我以天眼视天下人，死生好丑尊者卑者人死得好道者得恶道者，人于世间身作恶口言恶心念恶，常好烹杀祠祀鬼神者，身死当入泥犁中；身常行善口常言善心常念善，死即上天。」佛言：「人如天雨泡，雨从上沛之，一泡坏者一泡成，人生世间，生者死者如泡起顷。佛持天眼视天下人，死有上天者、入泥犁者，贫者富者、贵者贱者，人所为善恶。」佛言：「我皆知之。譬如瞑夜于城门两边各燃炬火，人有出者入者数千万人，从瞑中视，皆见火中出入者。」佛言：「我持天眼视天下人，死有上天者、入泥犁者，如人从瞑中视火中出入者，如上高楼上望下，有数千家中，从上视皆见诸家。」佛言：「我见天下人，死有上天者、入泥犁者，如人从高楼上视诸家。」

佛言：「如人乘船行清水中，皆见水中鱼石所有。佛持天眼视天下人，死有上天者、入泥犁者，如人视清水中鱼石。有明月珠，持五彩缕贯之，人视珠，皆见五彩，别知与珠相贯穿。」佛言：「我见天下人所从来善恶变化，如人视珠。」佛言：「我见天下人不孝父母，不事沙门道人、不敬长老，不畏县官禁戒，不畏今世后世者，不惊不恐。如是曹人死即入泥犁，与阎罗王相见，即去善归恶。泥犁卒名曰旁，旁即将人前至阎罗所。泥犁旁言：『此人于世间为人时，不孝父母，不事沙门道人，不敬长老，不布施，不畏今世后世，不畏县官。阎罗处此人过罪。』」

「阎罗即呼人前对阎罗言：『汝为人时，于世间不念父母养育推燥居湿乳哺长大，汝何以不孝父母？』其人即对阎罗言：『我实愚痴懦弱。』阎罗言：『处汝罪者，非父母非天非帝王，非沙门道人过，汝身所作，当自得之，是

第一问。』第二问：『汝不见病困剧时羸劣甚极手足不任？』其人言：『我实见之。』阎罗言：『汝何以不自改为善耶？』其人言：『实愚痴憍慢。』阎罗言：『是过，非天非父母非帝王，非沙门道人过，汝身所作，当自得之。』阎罗第三问：『汝不见世间男子女人老时，目无所见、耳无所闻、持杖而行，黑发更白，不如年少时？』其人言：『我实见老人持杖而行。』阎罗言：『当此之时，何以不自改为善耶？』其人言：『实愚痴憍慢。』阎罗言：『是过非父母非天非帝王，非沙门道人过，汝身所作，当自得之。』阎罗第四问言：『汝于世间时，不见男子女人死，一日二日至七日，身体腐烂形貌坏败，为虫蚁所食，为众人所恶？汝见是，何以不自改为善耶？』其人言：『我已见之，实愚痴憍慢。』阎罗言：『汝施行何以不端汝心端汝口端汝行，是过亦非父母，非天非帝王，非沙门道人过，汝身所作，当自得之。』阎罗第五问：『汝为人时，于世间宁见长吏捕得劫人杀人贼人，反缚送狱掠治考问，或将出城于道中格杀之，或有生辜掙者，宁见是不？』其人言：『我实见之。』阎罗言：『汝何以不布施作善？汝为人时，何以不正汝行正汝口正汝心耶？』其人言：『实愚痴憍慢。』阎罗言：『是过亦非父母，非天非帝王，非沙门非道人过，汝身所作，自当得之。』

「对已毕，泥犁旁即牵持去，将诣一铁城，是第一泥犁。阿鼻摩泥犁城有四门，周匝四千里，中有大釜长四十里，泥犁旁叉刺人而内之，如是无央数中皆有火，人遥见之皆恐怖战栗。如是入者数千万人，泥犁旁而内其中，昼夜不得出，门皆闭不开不得出，人在其中数千万岁，火亦不灭人亦不死。久久时，遥见东门自开，人皆走欲出。适到门，门复闭，诸欲出人复于门中共鬪争欲得出。久久复遥见西门开，人皆走往，门复闭，人复于门中共鬪。久久复见南门开，人皆走往，门复闭，人复于门中共鬪。久久四门复开，人得出，自以为得脱，复入第二鸠延泥犁中。人足着地者即焦，举足肉复生。有东走者、西走者、南走者、北走者，周匝地大热，数千万岁乃竟，自以为得脱。复入第三弥离摩得泥犁中，其中有虫，虫名崛喙，[口*(佳/乃)]如铁黑头足。虫遥见人，皆迎来啄人肌骨皆尽，如是数千万岁乃竟。自以为得脱，复入第四乌罗多泥犁中。其中有山，石利如刀，人皆走上其巅，复有走下者，皆欲求脱，不知当如向，足皆截剥，地石皆如利刀，如是复数千万岁乃竟。人自以为得脱，复入第五阿夷波多桓泥犁中。其中有热风，相逢避之不能得脱，其人欲求死不能得死，求生不能得生，如是久久数千万岁乃得出。人自以为得脱，复入第六阿喻操波泥桓泥犁中，多树木皆有刺，树间有鬼，人入其中者，鬼头上出火、口中出火，身为十六刺，遥见人来大怒，火皆见十六

刺，皆贯人身体裂如食之，皆走欲得脱走，常触是鬼，如是数千万岁乃竟得出。人自以为得脱，复入第七盘蕪务泥犁中。其中有虫，虫名鶡，人入其中者，是虫飞来入人口中食人身体，人皆走极，虫食不置，人皆四面走，欲求脱不能得脱，如是数千万岁乃竟得出。人自以为得脱，复入第八堕檀罗泥渝泥犁中。其中有流水，人皆堕水中，水边有刺棘，水热过于世间汤镬，热沸涌跃人皆熟烂，走欲上岸边，有鬼持矛逆刺人腹内其中，不能得出，入皆随水下流。复有鬼激如钩取，问之言：『若从何所来？若为是问。』其人言：『我不知何所从来，亦不知当若去？我但饥渴，欲逐饮食。』鬼言：『我与若食。』即取钩，钩其上下颌，口皆磔开，因取消铜注人口中皆焦烂，如是求死不能得死，求生不能得生。其人平生，于世间为人时作恶甚故，求解不得解。诸泥犁中人皆复得出，自以为得脱，反入第七泥犁。鬼逆问：『汝去，何以复还入第五，复还入第四，从第四复还入第三，复还入第二，复还入第一阿鼻摩泥犁？』未至，人遥见铁城，皆欢喜大呼称万岁。阎罗闻之即问泥犁旁：『是何等声？』旁即言：『是呼声者，是前过泥犁中者。』阎罗言：『是皆不孝父母，不畏天不畏帝王，不承事沙门道人，不畏禁戒者。』阎罗即复呼人前，对言：『若非恐阎罗言，今汝解脱去，当复为人作子者，当孝顺事长年，当畏帝王禁戒，当承事沙门道人，端心端口端身。人生在世时，罪过小且轻，死在地下，泥犁大且重。得沙门道人，当承事其道，当得阿罗汉者，诸泥犁道皆为闭塞。』

「一对皆毕，诸泥犁中人皆得出，在城外地皆复死，诸死者先世宿命，为人时作恶犹有小善，从泥犁还出，皆生善道。人从泥犁中出，各自政心政口政行，不复还入泥犁中。泥犁中亦不呼人，人更泥犁丑毒苦痛，各自思惟亦可为善。」

佛言：「人死入泥犁者，侯王沙门道人乃得与阎罗相见耳，凡余人者但随群入。阎罗，地狱王名也。」

佛说铁城泥犁经

【经文信息】大正藏第 01 册 No. 0042 铁城泥犁经

【版本记录】CBETA 电子佛典 Rev. 1.13 (Big5)，完成日期：2010/08/24

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，张文明大德提供，北美某大德提供，法雨道

场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】
